

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. TUAN TONY PUA KIAM WEE
(PETALING JAYA UTARA)**

PERTANYAAN : LISAN

TARIKH : 18.05.2016

Y.B. TUAN TONY PUA KIAM WEE [PETALING JAYA UTARA]
minta **MENTERI KEWANGAN** menyatakan apa sebabnya 1MDB
membayar “*top-up security deposit*” sebanyak US\$855 juta dan
US\$295 juta kepada Aabar Investment PJS Limited dan kenapa
pembayaran ini tidak memperolehi kelulusan daripada Lembaga
Pengarah 1MDB.

JAWAPAN

Tuan Yang Dipertua,

Jawapan terperinci berkaitan soalan YB Petaling Jaya Utara telah
pun diberikan oleh 1MDB seperti mana yang boleh dirujuk di dalam
Laporan Jawatankuasa Kira-Kira Wang Negara (“PAC”). Pembayaran

tersebut telah dibuat mengikut terma-terma yang telah dipersetujui oleh kedua-dua pihak.

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : DR. AZMAN BIN ISMAIL

TARIKH : 18.5.2016 (RABU)

SOALAN : 56

Dr. Azman bin Ismail [Kuala Kedah] minta **MENTERI PENDIDIKAN TINGGI** menyatakan tentang usaha-usaha supaya universiti awam menambahkan dana mereka sendiri. Usaha-usaha bagaimanakah yang boleh dilakukan oleh pihak universiti

JAWAPAN

Tuan Yang di-Pertua,

Pelan Pembangunan Pendidikan Malaysia 2015-2025 (Pendidikan Tinggi), dalam Lonjakan 5, telah menjelaskan strategi dan inisiatif yang bakal diambil oleh Kementerian untuk mewujudkan sistem kewangan yang mampan bagi pendidikan tinggi Negara yang menjurus kepada keberhasilan dan prestasi, serta melibatkan sumbangan pelbagai pihak dari sektor awam, swasta dan sosial.

Di antara inisiatif yang dicadangkan melibatkan sumber pendanaan yang pelbagai untuk IPT awam dan swasta bagi membolehkan penambahbaikan berterusan dalam kualiti program, serta penggunaan sumber yang lebih berhemat dan inovatif.

Sebagai sokongan kepada universiti awam, Kementerian sedang menghasilkan buku panduan bertajuk '*Enhancing University Income Generation, Endowment and Waqf*'. Buku panduan ini memberi garis

panduan dan contoh-contoh yang dilaksanakan di universiti luar dan dalam negara untuk menjana pendapatan bagi kelestarian pendanaan universiti.

Terdapat tujuh sumber yang boleh diterokai oleh universiti awam untuk menambah pendapatan mereka sendiri seperti yang dicadangkan di dalam buku panduan tersebut iaitu melalui:

1. program akademik dan penyelidikan;
2. aktiviti perniagaan, peruncitan dan sewaan aset universiti;
3. aktiviti pengurusan kewangan dan pelaburan;
4. tabung amanah, endowmen dan wakaf;
5. usahasama perniagaan antara universiti dan korporat/industri;
6. *fundraising*; dan
7. sumbangan awam.

Lembaga Pengarah Universiti (LPU) dijangka akan melaksanakan lebih banyak aktiviti penjanaan pendapatan dan perlu menggunakan rangkaian hubungan mereka untuk memacu penjanaan pendapatan universiti melalui sumber seperti pemberian hadiah, sumbangan korporat, pembangunan endowmen dan wakaf.